

Azreen Nabil dan Muhammad Arsyad berjaya merangkul pingat emas bagi acara pecut 100 meter pada kejohanan Varsity Track & Field 2024 di Stadium Perak, semalam. (Foto Muhamad Lokman Khairi/BH)



Arsyad, Azreen tepati ramalan

Atlet kebangsaan wakili skuad UPM bukti keunggulan kuasai acara 100 meter

Oleh Muhamad Lokman Khairi
bhsukan@bh.com.my

Ipoh: Muhammad Arsyad Md Saat dan Azreen Nabila Alias dinobatkan sebagai raja dan ratu pecut Sirkit Pertama Kejohanan Varsity Track & Field (VTF) 2024 selepas mengungguli acara 100 meter (m), semalam.



Kemenangan kedua-dua pelari yang mewakili Universiti Putra Malaysia (UPM) di Stadium Perak itu memang sudah diduga berdasarkan status mereka selaku atlet kebangsaan.

Arsyad yang mencatat masa 10.73 saat (s) bagaimanapun diberi tentangan sengit sebelum menewaskan pelari Universiti Malaya, Nabil Alwani (10.75s) dan Pengiran Aidil Auf yang mewakili KK Mas di tempat ketiga (10.87s).

Arsyad berkata walaupun catatannya itu bukan membe-

rangsangkan, namun kemenangan itu adalah permulaan yang baik baginya yang pertama kali menyertai VTF.

Perbaiki prestasi

"Kejohanan ini sangat baik kerana ada persaingan antara junior dan senior. Jadi dari situ, saya boleh perbaiki diri untuk meningkatkan prestasi."

"Untuk sirkit seterusnya, saya akan buat persiapan yang lebih baik untuk pecahkan rekod VTF iaitu 10.51 saat. Saya yakin mampu pecahkan," kata anak jati Batu Pahat, Johor itu yang berazam memburu emas kedua dalam acara 200m hari ini.

Sementara itu, Azreen Nabila yang mengungguli Kejohanan Grand Final VTF 2023 jelas

berada dalam kelas tersendiri apabila jauh meninggalkan pencabar lain dengan mencatat kepentasan 11.94s.

"Saya gembira kerana berjaya mengekalkan penguasaan. Namun, saya mahu catat masa lebih baik lagi pada sirkit akan datang. Berkat bimbingan jurulatih dan sokongan keluarga serta rakan, saya optimis boleh pecahkan rekod peribadi 11.77s yang dilakukan di Sukan Olimpik Tokyo 2020," kata Azreen Nabila.

Tempat kedua dimenangi atlet Universiti Pendidikan Sultan Idris (USPI), Nurul Wardatul Huwaida Mohd Hamka dan Fatin Ilyana Mat Nayan masing-masing menamatkan larian dengan catatan masa 12.79s dan 12.85s.